

1 JUAN

Introducción

Wawe'epíkaloje na penájeka Juan wakára'aka najló marí puráka'aloji yukuna marí:

Jesucristo i'imaká eja'awá chu wakajé, weká ke kaja ri'imaká ina'uké. Pu'uwaré wala'akare chaya ritaka'á i'imaká. Ripalamane aú Tupana amaro Jesucristo ja'apiyá jema'ajeño chaje. Ra'apiyatéjena penájemina, ajopana wa'até, ja'apátaño palá richuwá Tupana puráka'alo, e'iyonaja ajopana pechu i'imari apo'ojó wani Ripuráka'alo nakú. Nemaké Jesucristo nakú: “Unká weká ke kalé ri'imaká ina'uké, marí eja'awá chu ri'imaké wakajé. Ripéchuja kalé i'imari pajluwaja ina'uké e'iyá meketánaja, e'iyonaja unká ri'imalá rinapona wa'até, weká ke kaja”, ke nemájika rinaku. Nemaké kaja Tupana nakú: “Palájne'eke riká, unká la'alá pu'uwaré, ke. Marí eja'awá chu ina'uké la'año pu'uwaré, raú wawe'epi unká Tupana keño'otakarena kalé weká”. Nemaké kaja: “Apala rijwa'atéjena, je'echú chiyájena, ka'ajná keño'ótaño we'emaká, nakaje marí eja'awá chu i'imakare wa'até. Unká paala wanapona, wala'akare aú pu'uwaré. Unká Tupana kalé keño'ótari weká, ñakele unká kaja ra'alá rinakojó pu'uwaré wala'akare. Iná pechu keja iná la'aká pu'uwaré, iná wátaka ke. Unká Tupana wajálaje weká ripachá”, ke nemájika.

Nemá kaja: “Piyukeja weká i'imajeño kapichákajo liyá Tupana palamane aú, ñakele unká na penaje kalé Jesucristo taka'á ina'uké chaya i'imaká”, ke napechu i'imajika apo'ojó wani Tupana pechu liyá. Nala'aké kaja nekó we'epiño ke wani. Raú nala'aké ajopana ina'ukena mapechúruna ke najluwa, unkale napechu i'imalá napechu ke kaja.

Ina'uké we'epíkaloje kewákaje puráka'aloji nakojé penaje Juan lana'á marí puráka'aloji najló i'imaká. Riká yuriro kaja wajló. Ri'imá wajló riyukuna, wema'aká piyá pajlakaje puráka'aloji ja'apiyá. Rimá kaja wajló, wawátakaloje íki'ija pekowáaka penaje, wala'akáloje palá Tupana wátaka ke.

Kajmuchaji iná i'imakare aú matajnako je'echú chu yukuna marí

1 ¹Ina'uké Jesucristo i'imaká. Unká chiyó eja'awá i'imá, kaja ri'imaké. Ri'imaká marí eja'awá chu wakajé wamá ri'imaká; wema'á kaja ripura'akó; wajapa kaja rinaku wayáthe'ela aú i'imaká. Riká penájemi a'arí inajlo kajmuchaji iná i'imakáloje matajnako je'echú chu raú. ²Pu'uwaká ri'imaká wajló aú wamá ri'imaká, ñakele we'emá riyukuna ajopánajlo. Unká tajnákajo penaje kalé riká wemá nakú. Tupana wa'até ri'imá i'imaká, eyá pu'uwaká ri'imaká marí eja'awá chu. ³Riká wamákare yukuna we'emá ijló, eyá Ripuráka'alo, rimakare nakú wajló, wa'apata kaja ijló, ipechu i'imakáloje rinaku wapechu i'imaká rinaku ke kaja. Tupana pechu chuwa wapechu; Ri'irí Jesucristo pechu chuwa kaja wapechu, raú pajluwa japi keja weká pajwa'atéchaka. Ñaké kaja ipechu i'imakáloje penaje we'emá riyukuna ijló. ⁴Riyukuna walana'á ijló, ipechu i'imakáloje rinaku pu'ují wajwa'até.

⁵Tupana yukuna, Jesucristo i'imakare wajló i'imaká, wa'apata kaja ijló. Riká kemari Tupana nakú: “Unká méño'oyo kalajeruni i'imalá mejáma'atani wa'até pajñakani. Ñaké kaja Tupana, palá la'ajerí riká, ñakele unká riwe'epila pu'uaré la'akaná”. ⁶Apala wemá ka'ajná wanakuwá: “Tupana Pechu chuwa wapechu”, ke. E'iyonaja pu'uaré la'akaná nakú ja ka'ajná weká. Ilé ke la'ajeño we'emakachu, mapeja wapajlaka wanakuwá. ⁷Palá la'aká Tupana. Ñakele wala'aká aú palá ripalamane aú, we'emá pajluwa japi keja rijwa'até. Ñakele ripalamane aú wala'á kaja palá, rila'aká ke kaja, panakojéchaka ke wapechu i'imakale Tupana i'irí Jesucristo pechu wa'até. Riká taka'arí a'awaná apiyákakanami nakoje wachaya i'imaká. Riwakajé kajrú rira i'ijnaká itapuwa aphumi chiyá i'imaká. Ilé ke rita'aká wapumí chojé, pu'uaré wala'akare pachá, ripalamane wayuríkoloje unká japi la'alaño pu'uaré ke Tupánajlo.

⁸Apala pimá ka'ajná pinakuwá: “Unká nula'alá pu'uaré”, ke, pipechu i'imakale: “Kewaka numakare nunakuwá”. E'iyonaja unká kewaka kalé riká, Tupana kemakale piyukeja ina'ukena nakú: “Pu'uaré la'ajeño waja neká”, ke. ⁹Pimakachu pinakuwá: “Kewaka pu'uaré la'ajerí nuká, Tupana kemaká nunaku ke”, e riwe'epeje pimu'ují. Ramajo pichaje pu'uaré pila'akare liyá, raú pi'imajé unká japi la'alá pu'uaré ke rijló. ¹⁰Pimá kaja ka'ajná pinakuwá: “Unká nula'alá pu'uaré”, ke. Ilé ke pimaká pinakuwá

aú, pila'á Tupana pajlákachi ke pijluwa, unkale pema'alá Ripuráka'alo ja'apiyá, Ripuráka'alo kemakale piyukeja ina'ukena nakú: “Pu'umaré la'ajeño waja neká”, ke.

Wachaya pura'ajero Jesucristo

2 ¹Nulakena, nulana'á ijlo marí, unkale nuwátala ila'aká pu'umaré. E'iyonaja iná la'akachu pu'umaré, Jesucristo pura'ó iná chaya Tupana wa'até. Unká la'alá pu'umaré riká. ²Jesucristo taka'arí wachaya i'imaká, raú Tupana amákoloje wachaje pu'umaré wala'akare liyá. Unká wacháyaja kalé ritaka'á i'imaká; piyuke ina'uké, eja'awá chu i'imakaño, chaya wa'ató ritaka'á kaja i'imaká. ³Tupana wakára'aka ke la'ajeño we'emakachu, wawe'epí naka riká. ⁴Apala pajluwa ka'ajná kemari rinakuwá: “Nuwe'epí naka Tupana”, ke. E'iyonaja unká rila'alá riwakára'aka ke, raú iná we'epí pajlákachi riká, unká kewákaje puráka'aloji i'imalá ripechu nakú. ⁵Eyá Tupana wakára'aka ke la'ajerí wátari íki'ija riká, ajopana ina'ukena wa'até, raú iná we'epí Tupana pechu chuwá kaja ripechu. ⁶Apú ka'ajná kemari rinakuwá: “Tupana pechu chuwá nupechu”, ke. Pu'uwaká rila'akachu palá, Jesucristo la'aká i'imaká ke kaja, raú iná we'epí kewaka rimaká rinakuwá.

⁷Nojena, íki'ija nuwátakarena, nulana'á ijlo mékeka Jesucristo wakára'aka weká, wawátakaloje íki'ija pekowáaka yukuna. Unká meyáleje kalé rimá rinaku, kaja júpimi eyá, jema'á mékeka riwakára'aka wawátakaloje íki'ija pekowáaka yukuna. ⁸Nakeño'oká Jesucristo yukuna i'imakana ijlo wakajé, ne'emá ijlo riyukuna i'imaká. Riwakára'a weká, wawátakaloje íki'ija pekowáaka. Meyáleje keja wajlo riyukuna, Jesucristo watakale weká íki'ija. Ńaké kaja wawátaka íki'ija pekowáaka. Ilé kaje aú iyurí pu'umaré la'akaná iliyó; chuwa, kaja palá la'akanaja iwe'epí itukumó. Kalajeruni kapichako mejáma'atani aú, ke kaja riká ijlo.

⁹Apala pimá kaja pinakuwá: “Unká nula'alá pu'umaré”, ke. E'iyonaja ka'ajná chapú pipechu pejena, ajopana Jesucristo ja'apiyá jema'ajeño nakú. Ilé ke pipechu i'imaká aú, iná we'epí re jo'ó kaja jo'ó pu'umaré la'ajerí piká. ¹⁰Palá la'ajerí iná, iná watakachu íki'ija iná ejena. Raú unká iná ja'aló pu'umaré la'akaná ejo. ¹¹Chapú péchuri rejena nakú, re jo'ó kaja jo'ó pu'umaré la'ajerí riká. Kalajerúwaka ja'apákaño, unká we'epila méño'ojoka ne'ejnaká, ke kaja riká.

¹²Iká yuwanajlo nulana'á marí puráka'aloji:

Kaja Tupana amákarona chaje iká, pu'umaré ila'akare liyá.

Palá Jesucristo la'aká iká raú, ripalamane ramó ichaje.

- ¹³ Yuwaná chi'inajlo wa'ató nulana'á kaja marí,
iwe'epíkale naka Jesucristo.
Eja'awá keño'okó wakajé, kaja re ri'imaké.
Walijímanajlo, ináyanajlo wa'ató, nulana'á kaja marí,
unkale jema'alá Jiñá Chi'inárikana ja'apiyá.
- ¹⁴ Nuwakára'a kaja yuwanajlo marí puráka'aloji,
wara'apá Tupana wa'atéjena kaja ne'emakale.
Nuwakára'a kaja yuwaná chi'inajlo marí,
nawe'epíkale Jesucristo nakojé.
Kaja ri'imaké, eja'awá keño'okó piyá.
Nuwakára'a kaja marí walijímanajlo, ináyanajlo wa'até,
kaphí péchuruna ne'emakale.
Napechu nakuja Tupana puráka'alo,
raú unká meke la'ajé nema'alá Jiñá Chi'inárikana ja'apiyá.
- ¹⁵ Iwátaniña pu'uwaré la'akaná, ila'aká piyá unká jema'alaño
Tupana ja'apiyá la'aká ke kaja marí eja'awá chu. Iná wátakachu
ñaké la'akana, unká iná wátala Tupana. ¹⁶ Unká riwakára'ala
ina'uké la'aká ke'iyapé nakaje napechu keja. Le'ejepelaji kaje
amaro najló. Riká a'arí name'é rijluwa, nawátakaloje richaje,
richaje ke, piyukeja nakaje najluwa. Nanane aú nala'á nekó
chá'atajeño ke wani. Kajrú ina'ukena, marí eja'awá chu i'imakaño,
la'aká ñaké; unká Tupana liyaje kalé ilé ke la'akana. ¹⁷ Kaja
eja'awá keño'ó kapichákajo, piyuke nakaje ina'uké wátakare
najluwa wa'até. Tupana wátaka ke la'akaño, nekaja kalé i'imajeño
makapichako je'echú chu.

**Iná we'epíkaloje kewákaje yukuna,
pajlakaje yukuna liyá penaje marí**

¹⁸ Nuwátakarena, yewicha eja'awá iphaka kaja penaje rená
chojé. Kaja jema'á nemaká i'imaká: “Pajluwaja, chapú wani
péchuri Jesucristo nakú ri'imajika, iphájeri majó”. Kaja riphá rená
chojé; chuwa re cha'apá ina'ukena, chapú péchuruna Jesucristo
nakú. Ilé kaje aú wawe'epí yewíchaja eja'awá iphaka kaja
penaje rená chojé. ¹⁹ Chapú péchuruna Jesucristo nakú i'imaño
wanakiyana wa'até i'imaká. Kaja na'apáña we'emaká, unkale
wapechu ke kalé napechu i'imakale. Wapechu ke kaja napechu
i'imakela, unká nayuríla'la weká. Na'apá waliyá i'imaká, raú
wawe'epí mékajenaka neká, unká wapechu ke kalé péchuruna
ne'emaká.

²⁰ Jesucristo, unká we'epila pu'uwaré la'akaná, a'arí ijló Tupana
Pechu, raú iwe'epí kewákaje puráka'aloji nakojé. ²¹ Nuwakára'a

ijló marí puráka'aloji, iwe'epíkale kewákaje puráka'aloji nakojé. Unká nulana'alá ijló riká, iwe'epíkaloje rinakojé penaje, kaja iwe'epí rinakojé, ñakele iwe'epí unká pajlakaje i'imalá kewákaje puráka'aloji e'iyá.

²²Marí kaje aú iná we'epí mékajeka pajlákachi, kemari Jesucristo nakú: “Unká Tupana kalé wakára'ari rila'aká rijápaka'ala marí eja'awá chu i'imaká”. Ilé ke rimaká aú iná we'epí pajlákachi riká. Chapú péchuri kaja riká Jesucristo nakú, unkale riwátala Tupana, Ri'irí wa'até. ²³Ne'iyajena kemaño Jesucristo nakú: “Unká Tupana wakára'akare kalé riká”. Ilé ke nemakachu rinaku, iná we'epí unká Tupana wa'atéjena kalé neká. Eyá kemaño rinaku: “Tupana wakára'ari rila'aká nakaje marí eja'awá chu i'imaká”, raú iná we'epí Tupana wa'atéjena neká. ²⁴Ñaké i'imakale, a'á inakojó Tupana puráka'alo, a'aká rinakojó i'imaká, ikeño'oká ra'apiyá jema'akana wakajé eyá, ke kaja. Raú iká i'imajeño ñakeja wani pajluwa japi keja Tupana wa'até, eyá ñaké kaja Ri'irí wa'até. ²⁵Jesucristo a'arí wajló kajmuchaji, we'emakáloje matajnako je'echú chu raú. Rimaká wanaku i'imaká ke, ke ra'ajika wajló riká.

²⁶Marí ke nulana'aká ijló, jema'aká piyá ijwa'até pajlákano ja'apiyá. ²⁷Jesucristo a'arí ra'apiyá jema'ajéñojlo Ripechu. Riká jewíña'atari iká piyukeja kewákaje puráka'aloji nakú. Iyuró ñakeja Ripechu ja'apiyá; rewíña'ataka iká ke ila'á piyukeja nakaje palá.

²⁸Nulakena, ipechu i'imá Jesucristo pechu chuwa, raú ipechu i'imajé kaphí majó riphájika wakajé; unká kaja apáña'alajo ripiyá riwakajé. ²⁹Kaja iwe'epí rila'aká piyukeja nakaje palá. Ñaké kaja la'akaanó, Tupana yaní neká. Kaja iwe'epí rinakojé.

3 ¹Kaja iwe'epí meke íki'ika wara'apá Tupana wátaka weká. Íki'ija wani riwátaka weká, raú rimá wanaku: “Nuyani neká”, ke. Riyani jo'ó weká. Unká jema'alaño Tupana ja'apiyá, unká we'epílaño riyánika weká; unká kaja nawe'epila rinakojé. ²Nojena, íki'ija nuwátakarena, kaja Tupana yaní weká. Unká jo'ó wawe'epila palá mékeka we'emajika; wawe'epí Jesucristo iphájika majó wakajé, riká ke kaja we'emajika. Riwakajé wamaje mékaje wánika riká. ³Wátano ñaké i'imakana, ka'año nanakiyó chapú kaje napechu nakú i'imakare, napechu i'imakáloje palá, Jesucristo pechu i'imaká ke kaja penaje.

⁴La'arí pu'uaré, unká Tupana ja'apiyá jema'ajeri kalé riká. Unká la'alá Tupana wakára'aka ke, pu'uaré la'ajeri riká. ⁵Kaja iwe'epí Jesucristo iphaka majó marí eja'awá nakojé i'imaká, rila'akáloje weká unká japi la'alaño pu'uaré ke Tupánajlo. Unká wani Jesucristo we'epila pu'uaré la'akaná; unká wani chapú

kaje i'imalá ripechu nakú. ⁶I'imari pajluwa japi keja Jesucristo wa'até, unká i'imalá pu'uaré la'akaná nakú. Eyá pu'uaré la'ajerí, unká Jesucristo wa'ateje kalé riká, unká kaja riwe'epila naka riká. ⁷Íki'ija nuwátakarena, jema'aniña pajlákachina ja'apiyá. Palá la'ajeño la'año palá, palá péchuruna ne'emakale. Jesucristo pechu ke kaja napechu i'imakale, nala'á palá. ⁸Eyá i'imari pu'uaré la'akaná nakuja, Jiñá Chi'inárikana wa'ateje riká. Jiñá Chi'inárikana keño'orí pu'uaré la'akaná rikeño'oká i'imakaje eyá. Eyá Tupana i'irí iphari majó i'imaká, rikapichátakaloje riliyá rijápaka'ala penaje.

⁹Iná i'imakachu Tupana wa'ateje, unká iná i'imalá pu'uaré la'akaná nakú. Tupana Pechu i'imakale iná e'iyá, unká méño'ojo rijwa'atéjena i'imalá pu'uaré la'akaná nakú. ¹⁰Palá iná we'epika mékajenaka Tupana wa'atéjena, eyá mékajenaka Jiñá Chi'inárikana wa'atéjena. Unká la'alaño palá, unká kaja wátalaño íki'ija ajopana ina'ukena, unká Tupana wa'atéjena kalé neká.

Íki'ija wawátakaloje pekowáaka penaje yukuna marí

¹¹Ikeño'oká Jesucristo yukuna jema'akana i'imaká wakajé, nemá ijló i'imaká: “Iwata íki'ija pekowáaka”, ke. ¹²Wala'aniña Caín michú la'aká i'imaká ke. Jiñá Chi'inárikana wa'ateje ri'imakale, rinó re'ewé michú i'imaká. Marí kaje jimaje rinó ri'imaká: Pu'uaré la'ajerí Caín michú i'imaká, eyá re'ewé michú i'imari palá la'ajerí. Nakaje rila'akare i'imari palani Tupánajlo, raú Caín amari chapú re'ewé, rinókaloje riká penaje.

¹³Nojena, unká jema'alaño Tupana ja'apiyá pechu i'imajika ee chapú inaku, ipechu i'imaniña: “¿Naje ilé ke napechu wanaku?”, ke. ¹⁴Kaja we'emaó kapichákajo chiyá, we'emakáloje matajnako penaje. Wawe'epí ñaké riká wajló, wawátakale íki'ija wejena, ajopana Jesucristo ja'apiyá jema'ajeño wa'até. Eyá neká unká wátalaño íki'ija ajopana, kapichájeño penájena neká. ¹⁵Chapú péchuri rejena nakú, ina'uké nójeri ke riká Tupánajlo. Kaja iwe'epí unká méño'ojo Tupana Pechu i'imalá ina'uké nójeri e'iyá. Unkachu Ripechu i'imalá iná e'iyá, unká iná i'imalaje matajnako je'echú chu rijwa'até. ¹⁶Wawe'epí Jesucristo wátaka weká íki'ija, ñakele riyurí nenókaloje riká wachaya. Palani ñaké kaja wapechu i'imakajla wanakiyana nakú, wataka'akálojejla nachaya penaje. ¹⁷Re ka'ajná wajló ñó'ope nakaje, we'emakáloje palá raú penaje. Eyá re ka'ajná apú wanakiyana, kamu'ují wani la'aká. E'iyonaja unká ka'ajná wawe'epila rimu'ují; unká ka'ajná wa'alá rijló nakaje rila'akare nakú kamu'ují. Unkachu wa'alá ilé kajena ñathé, iná we'epí unká

Tupana Pechu ja'apiyá kalé weká; Ripechu aú iná wata íki'ija ajopana. ¹⁸Íki'ija nuwátakarena, unká paala mapeja wemaká wanakiyana nakú: “Íki'ija wawátaka neká”, ke. Palá nanaku la'akana aú iná we'epí íki'ija iná wátaka neká.

¹⁹Wawe'epí Tupana wa'atájena weká, íki'ija wawátakachu wanakiyana. Ilé ke ri'imakale wajló, unká wawó la'aló Tupana jimaje. ²⁰Apala iná pechu: “Unká paala ka'ajná nula'aká”, ke. E'iyonaja Tupana chá'atari wapechu, riwe'epíkale piyukeja nakaje iná pechu nakú i'imakare. ²¹Íki'ija nuwátakarena, wemakachu pu'uwaré wala'akare nakú Tupánajlo, rimaká rinaku ke kaja, e kaphí wapechu i'imajika rijwa'até pura'akano nakú. ²²Riká a'ajeri wajló piyuke nakaje wakejá'ajikare riliyá, wala'akale piyuke nakaje ri'imakáloje palá rinaku penaje. ²³Riká wakára'ari wapechu i'imaká kaphí Ri'irí Jesucristo chojé; riwakára'a kaja wawátaka íki'ija pekowáaka. ²⁴Tupana pechu ke ra'apiyá jema'ajeño pechu, rejenowaja wapechu, Ripechu i'imakale we'iyá. Ripechu ra'akare wajló aú wawe'epí ñaké riká.

4 ¹Nojena, íki'ija nuwátakarena, jema'aniña piyuke ina'uké ja'apiyá kemaño nanakuwá: “Tupana ja'apiyá ke wa'apátaka ijlo ripuráka'alo”, ke. Paineke i'imá nako'oná, raú iwe'epíkaloje mékajenaka neká. Re ka'ajná Tupana Pechu ne'iyá, unká ka'ajná. Re kajrú ina'ukena kemaño mapeja nakuwá: “Tupana ja'apiyá ke wa'apátaka ijlo Ripuráka'alo”, ke. ²Marí kaje aú iwe'epeje mékajena e'iyá kewaka Tupana Pechu: Pu'uwaká nemájika Ripechu ja'apiyá ke marí ke Jesucristo nakú: “Marí eja'awá chu ri'imaké wakajé, weká ke ri'imaká ina'uké”. Ilé ke nemaká aú, iná we'epí re ne'iyá Tupana Pechu. ³Unká kemalaño ñaké Jesucristo nakú Tupana Pechu ja'apiyá ke, unká Ripechu i'imalá ne'iyá. Re apú péchuji ne'iyá, ñaké i'imakale, chapú napechu Jesucristo nakú. Kaja nakaje, júpimi nemájikare nakú ijlo i'imaká, iphari rená chojé. Kaja cha re kajrú ina'ukena me'etení, chapú péchuruna Jesucristo nakú.

⁴Íki'ija nuwátakarena, Tupana wa'atájena iká. Ripechu i'imakale e'iyá, unká a'alá inakojó pajlákachina puráka'alo. ⁵Chapú péchuruna Jesucristo nakú pura'año nakaje marí eja'awá chu i'imakare nakuja. Napechu ke i'imakaño jema'año na'apiyá, napechu i'imakale chapú kaja Jesucristo nakú najwa'até. ⁶Eyá weká, Tupana wa'atájena, ñakele we'emá riyukuna ina'ukejlo. We'epiño rinakojé, jema'año wa'apiyá riká; eyá unká we'epi'alaño rinakojé, unká kaja jema'alaño wa'apiyá. Ilé kaje aú wawe'epí mékajenaka i'imaká kewákaje puráka'aloji

ja'apiyá; raú kaja wawe'epí mékajenaka i'imaká pajlakaje puráka'aloji ja'apiyá.

Tupana wajwena ina'uké yukuna marí

⁷Nojena, íki'ija nuwátakarena, iwata íki'ija pekowáaka. Tupana Pechu ja'apiyá i'imakana aú iná wata íki'ija pekowáaka. Raú kaja iná we'epí Tupana nakojé. ⁸Íki'ija Tupana wátaka ina'uké. Ñakele rila'á iná pechu palá, iná wátakaloje kaja íki'ija ajopana ina'ukena. Unká wátalaño íki'ija ajopana ina'ukena, unká kaja we'epílaño Tupana nakojé. ⁹Tupana wakára'ari Ri'irí wani marí eja'awá chojé i'imaká. Pajluwaja Ri'irí. Riwakára'a ri'imaká, ra'akáloje wajló kajmuchaji, we'emakáloje matajnako je'echú chu. Ilé kaje aú wawe'epí riwátaka weká íki'ija. ¹⁰Unká weká kalé wátalaño íki'ija ri'imaká paineko; riká wátari we'emaká íki'ija paineko. Ñakele riwakára'a Ri'irí majó i'imaká, ritaka'akáloje wapumí chojé, pu'umaré wala'akare pachá. Jesucristo palamane aú Tupana amó wachaje, pu'umaré wala'akare liyá.

¹¹Nojena, íki'ija nuwátakarena, íki'ija Tupana wátaka weká, ñakele palani wawátaka kaja íki'ija pekowáaka. ¹²Unká na kalé amari Tupana; wawe'epí re riká wajwa'até, wawátakachu íki'ija pekowáaka. ¹³Tupana a'arí wajló Ripechu, raú wawe'epí wajwa'até riká. ¹⁴Weká amaño Ri'irí i'imaká, riká riwakára'akare majó ina'uké i'imatájeri penaje. Riyukuna we'emá ajopánajlo, ajopánajlo ke. ¹⁵Nemaká aú Jesucristo nakú: “Tupana i'irí riká”, ke, iná we'epí Tupana Pechu i'imaká ne'iyá, Tupana wa'até kaja napechu.

¹⁶Wawe'epí íki'ija Tupana wátaka weká. Wawátakachu íki'ija pekowáaka, wawe'epí kaja Ripechu chuwá wapechu. ¹⁷Ñaké i'imakale wawata íki'ija pekowáaka. Akijñojo Tupana kemaje wanaku, mékeka rijló nakaje wala'akare, marí eja'awá chu we'emaká ketana i'imaká. Riwakajé unká wawó la'alajo ripiyá, wala'akale marí eja'awá chu Jesucristo la'aká i'imaká ke kaja. ¹⁸Wawátakachu íki'ija Tupana, unká wawó la'alajo ripiyá. E'iyonaja iná pechu i'imakachu rinaku: “Riwajaje ka'ajná nuká”, ke, unká jo'ó wawátala riká íki'ija, riwátaka weká ke.

¹⁹Wawata íki'ija Tupana, riká wátakale íki'ija we'emaká paineko. ²⁰Apala pimá ka'ajná pinakuwá: “Íki'ija nuwátaka Tupana”, ke. E'iyonaja ka'ajná chapú piwó apú pinakiyana cha, raú iná we'epí pajlákachi piká. Iná nakiyana, iná amákarena neká. Unkachu iná wátala neká íki'ija, unká méño'oyo iná wátala íki'ija Tupana, unká iná amálare. ²¹Marí ke Jesucristo wakára'aka weká: “Iwata íki'ija Tupana, wa'até iwata kaja íki'ija ejena”.

5 ¹Tupana a'arí Ri'irí Jesucristo we'ematójeri penaje. Kaphí wapechu i'imakachu richojé, Tupana yaní weká. Iná wátakachu íki'ija riká, iná wata kaja íki'ija riyani.

²Wawátakachu íki'ija Tupana, eyá wala'akachu riwakára'aka ke, wawe'epí kaja wawátaka íki'ija riyani, ra'apiyá jema'ajeño.

³Íki'ija iná wátakachu Tupana, iná la'á riwakára'aka ke. Nakaje riwakára'akare iná la'aká, unká laka'apheji kalé rila'akana.

⁴Kaphí wapechu i'imakale Tupana chojé, unká wala'alá pu'uwaré ajopana, unká jema'alaño ra'apiyá la'aká ke. Rijwa'atéjena yuriño naliyó pu'uwaré la'akaná. Unká nala'alá pu'uwaré, unká jema'alaño ra'apiyá la'aká ke, kaphí napechu i'imakale Jesucristo chojé. Ripalamane aú ja kalé wayurí pu'uwaré la'akaná waliyó.

⁵Kaphí Jesucristo chojé péchurunaja kalé we'epiño Tupana i'irí wani riká; ripalamane aú unká ne'emalá pu'uwaré la'akaná nakú.

⁶⁻⁷Wawe'epí Tupana i'irí wani riká, rimakale rinaku: “Nu'urí”, ke. Juan el Bautista la'aká bautizar ri'imaká wakajé, Tupana pura'aró je'echú chiyá rinaku, rimá: “Nu'urí”. Ñaké kaja rimaká rinaku je'echú chiyá, ritaka'aká a'awaná apiyákanami nakú wakajé. Kewákaje puráka'aloji nakú pura'ajero, Tupana Pechu, kemari ñaké. Weji kele kemaño rinaku ñaké. ⁸Ripechu kemari rinaku: “Tupana i'irí riká”, ke; Tupana kemari kaja: “Nu'urí riká”, ke, nala'aká bautizar riká wakajé. Eyá nephaka riká a'awaná apiyákanami nakú wakajé, rimá piño ñaké kaja. Panakojéchaka ke napuráka'alo, ilé kaje aú iná we'epí Tupana i'irí Jesucristo. ⁹Ina'uké i'imaño Jesucristo yukuna wajló i'imaká. Wema'á na'apiyá. Tupana i'imari kaja Ri'irí yukuna wajló. Ina'uké chaje riwe'epika riyukuna nakojé, ñakele richaje palaka Tupana ja'apiyá jema'akana. ¹⁰Kaphí Tupana i'irí chojé péchuruna we'epiño kewaka rimaká Ri'irí nakú; eyá unká kaphí kalé richojé péchuruna la'año Tupana pajlákachi ke najluwa, unkale nema'alá ra'apiyá nakaje rimakare Ri'irí nakú. ¹¹Tupana kemari wanaku i'imaká: “Nuká a'arí ina'ukejlo kajmuchaji, ne'emakáloje matajnako je'echú chu raú. Nu'urí, Jesucristo ja kalé a'arí ijlo riká”, ke rimaká. ¹²Iná i'imakachu Tupana i'irí palamane aú, re inajlo kajmuchaji, iná i'imakáloje matajnako je'echú chu raú penaje. Unkachu iná i'imalá Ri'irí palamane aú, unká kaja kajmuchaji i'imalá inajlo, raú iná i'imakáloje matajnako je'echú chu.

Kaja penaje Juan kemakare nakú najló i'imaká marí

¹³Tupana i'irí ja'apiyá jema'ajeñojlo nulana'á marí, iwe'epíkaloje raú i'imajika matajnako je'echú chu.

¹⁴Tupana nakoje wapechu watána'a, ra'akale wajló nakaje wakejá'akare riliyá. Palani nakaje wakejá'akare riliyá i'imakachu rijló, ra'á wajló riká. ¹⁵Wawe'epí Tupana jema'aká wapura'akó rijwa'até; wawe'epí kaja ra'aká rinakojó nakaje wakejá'akare riliyá.

¹⁶Apala pamá pajluwaja Jesucristo ja'apiyá jema'ajeri la'aká pu'uaré. Ilé pu'uaré rila'akare pachá unká rikapichálajo Tupana liyá, ripajño'otájika ee ripéchuwa, pu'uaré rila'akare liyá Tupana ejo. Pipura'ó Tupana wa'até richaya, rema'akáloje ra'apiyá piño, ri'imakóloje raú. Apú ka'ajná la'arí pu'uaré, pachá iná kapichó wani Tupana liyá. Unká ramálajo richaje ripachá. Ilé ke la'ajeño chaya unká iná pura'aló rijwa'até. ¹⁷Piyuke pu'uaré ina'uké la'akare, unká paala Tupánajlo riká. Re nakaje unká riwátalare iná la'aká, e'iyonaja unká iná taka'alá ripachá.

¹⁸Wawe'epí Tupana i'imakachu wara'apá, weká ra'apiyá jema'ajeño unká i'imalaño pu'uaré la'akaná nakú, júpimi we'emajika ke. Tupana i'irí mejñátakale weká Jiñá Chi'inárikana liyá aú, unká we'emalaje pu'uaré la'akaná nakú.

¹⁹Wawe'epí Tupana wa'atéjena weká, eyá unká jema'alaño ra'apiyá, Jiñá Chi'inárikana wa'atéjena. ²⁰Wawe'epí Tupana i'irí iphaka majó i'imaká. Rikaja kalé la'arí wapechu palá, wawe'epíkaloje Tupana nakoje raú. Wachi'inárikana jo'ó riká, Jesucristo; matajnako ri'imajika, kajmuchaji minárikana kaja riká. ²¹Íki'ija nuwátakarena, ipechu i'imaniña apú nakú ka'ajná, nakaje jenami nakú ka'ajná: “Wachi'inárikana riká”, ke.

Kaja.